

## PABOJA ETEHUE'YO CONOSA CUIÑAJJI YASIJJE COLOSENSÉS

*Pabohua Shomajo ejeanobia aniya esohui tehue  
canaje Jesusaja epeeji cuana Conosa cuiñajjijo ba'e  
yasijje*

<sup>1</sup> Eya Pabo, Jesosa Quitoja huojea'yo ojaya esohui huohuiya. Jamaya Eyacuiñajji sa poanaje.

<sup>2</sup> Timoteohua esejaya epeeji enijje esohui tehue cani miqiana huasijje jama ba'a: Ma Eyacuiñajjija epeeji cuana huasijjeme Conosa cuiñajjijo ba'e, ecuanaja epeeji e'e jojo nei Jesosa Quito nijje jjapee neinei-quiani yasijje.

¡Esejaya Chii aiya, Eyacuiñajjiya miqianaya ca-  
jaahuana cahua quea pame nee, quea bei capo  
mee cahua pea'ai!

*Pabohua Eyacuiñajji bihuia cani*

<sup>3</sup> Eyacuiñajji, esejaya Emeshi Mese nei Jesosa Quitoja Chii eyaya bihuia tiitiaña onijje miqianajo mimianijo. <sup>4</sup> E'e, pea cuaa eya huohui cani jama ba'a: —Jesusaja epeeji cuaa Conosajo ba'ecaa Jesosa Quito shajja'ajja cani tii. Ojjaña Eyacuiñajjija epeeji cuana quea jea nee acani pea'ai.

<sup>5</sup> E'e, miqianaya esohui e'e jojo nei Jesosa Quitoja yahuajo pishana shajja'ajja coo majje onijje jjapeequinaje. Jjashahuabaquiani eba'e tiiti'yojji quea pame nee eyajo onijje pea'ai. E'e

jojo nei Eyacuiñajjiya jamaya acaje'yo miquianajo. <sup>6</sup> Jiquio esohui e'e jojo nei Jesosa Quitojo ojjaña meshi yasijje huohui cani. Jamajjeya quea huiso dejja ba'e mee cani quea pame nee, miquiana jayojjaya. Jamaya miquianaaya esohui shajja'ajja coo majje jjabahuejjaqui'yonaje. Jamajjeya jjabahuejja neinei'qui'yonaje ba'a: Eyacuiñajjiya dejja cuana jaahuana cani e'e jojo nei. <sup>7</sup> Dejja Epapasi bajjani ecuanajaya quea jea nee. Ohuaya Jesosa Quitoja esohui huohui ca'yonaje miquiana que. Oya ecuana jayojjaya Jesosa Quitoja yajjijo chacochoani. Ecuana sohuihuohui sahuajji quea pame nee pea'ai. <sup>8</sup> Ohuaya ecuana huohui canaje jama ba'a: —Edojjoshahua Pameya Jesosaja epeeji cuana Conosajo ba'e pea epeeji cuana quea jea nee po mee cani —Epapasi poanaje.

*Pabo miminaje Eyacuiñajji nijje*

<sup>9</sup> Eapasija esohui quea pame nee miquianajo shajja'ajja'yo majje ecuana Eyacuiñajji nijje mimi huicha'a huicha'ani jama ba'a: —Eyacuiñajji, ¡ecuanajaya epeeji cuana ba neinei meesahuacue ache echacojji shai mijo onajaya poaje! Edojjoshahua Pameya oya cuana miquea esohui caba meesahua cahua quea pame nee, cajjashahuabaqui meesahua cahua quea ja'a nee epojji pea'ai. <sup>10</sup> Jamajjeya ¡oya cuana Jesosa Quitoja esohui jayojja jama ba'e tiitii mee'yocue! Jamaya poanijo Jesosa Quito quea bihui nee nee poaje onajo. ¡Quea pame nee nee chaco tiitii meecue Jesosa Quitojo pea'ai! E'e Eyacuiñajji, ¡miquea epeeji mijo jjabahuejja tiitii meequicue

pea'ai! <sup>11</sup> Miya ca ca oe quea ca'a nee nee, Eyacuiñajji. Jamajjeya imiquea epeeji cuana Conosajo ba'e jjapeequi meesahuacue quea ca'a nee nee! Jamajjeya oya cuana miquea esohui pajea'yo ajja tii tii dejja quea mase cuaa napa cajje, yeno'ama poaje. <sup>12</sup> Eyacuiñajji, ecue Chii ai, oya cuana quea boejea'yo po mee'yona je miyaya. Jamajjeya quijje oya cuana miquea pea epeeji cuana nijje ba'e tiitii meeje'yo quea ja'a nee minijje eyajo. E'e Eyacuiñajji, jamajjeya apoa.

<sup>13</sup> Yahuaajo eseya Edosiquiaa napa ca'yona je. Quea mase nee, quea mimishi nee nee. Jjeya ca ca esejaya Chii aiya eseya jjeshe ca'yona je. Jamajjeya oja Bacua oe nei esejaya Emeshi Mese nei quea ca'a poaje'yo tii. Oja Bacua Jesosa Quito Eyacuiñajjija quea jea nee nee poani tii tii. <sup>14</sup> Jama ba'a: Jesosa Quitohua esejaya mimishi cuana cuijea'yo majje Edosiquiana quea ca'a nee eseya mesena pajea mee ca'yona je.

### *Jesosa Quito esejo mano'yona je*

<sup>15</sup> Dejja cuanaja Eyacuiñajji ecojja bajji pojjeama, jjacojjaba meequi ajja. Jamatii oja Bacua Jesosa Quito Eyacuiñajji jayojja nei neiya, o jayojjaya jama poani pea'ai. Jamajjeya Jesosa Quito ba majje Eyacuiñajji esejaya eba. Oya, Jesosa Quito ojjaña e'aquiana mese. Ojjaña aquiana cuana oja pana poa. <sup>16</sup> E'e, Eyacuiñajjiya Jesosa Quito nijjeya ojjaña aquiana cuana pana ca'ya poa, jiquio aquiana ba'a: Ojjaña aquiana ojjaña meshi cuana najo pana ca'ya poa; ojjaña aquiana eyajo pana ca'ya poa pea'ai. Aquiana cuana ecojjaja ebajji, pea aquiana ecojjaja ebajji pojjeama pea'ai pana

ca'ya poa jiquio ba'a: Eyacuiñajji esohuidojojji quea ca'a nee pana ca'ya poa, eshahua cuana quea huiso, quea mimishi po jjimahuajo, pana ca'ya poa pea'ai. E'e, Eyacuiñajjiya Jesosa Quito nijjeya ojjaña aquiana, ojjaña tii pana ca'ya poa Jesosa Quitoja ya'yojji. <sup>17</sup> E'e, oya Jesosa Quito ba'e tiitiya poa ojjaña aquiana pana jjimahuajo. Ojjaña aquiana nequi tiitii mee cani quea pame nee, Jesosa Quitohua. <sup>18</sup> Ojjaña ojaya epeeji cuanaja mese poani tii tii pea'ai. Ohuaya ma epeeji ojaya huapa pojjeama jayojja jama ojee jjapeequi meesahua cani, ojjaña. O jayojja ba'e meesahua cani. Mano'yo majje Jesosa Quito ebionei shequi o'oyanaje. Jamajjeya oya oe nei quea ca'a nee nee poani tii tii. <sup>19</sup> E'e, oja Bacua Jesosa Quito o jayojja poani tii tiijo, Eyacuiñajji quea bihui nee nee poani. <sup>20</sup> Yahuaajo dejja cuana quea mimishijo Eyacuiñajjiya ojjaña aquiana cajaa aca'ya poa. Jesosa Quito acui ecueata'apeejo ba'e na cuayaqui'yonaje. Mano'yonaje. Jamajjeya Eyacuiñajjiya mimishi cuana cuijea caje'yo. Jamajjeya quea bei po o'oyanaje ojjaña oja pana cuana nijje eyajo, meshi cuanajo anica cuana nijje pea'ai.

<sup>21</sup> E'e, miqianaya yahuaajo quea mimishi poanijo, quea jjashahuabaqui tai poanijo pea'ai Eyacuiñajji nijje jjapeequi ajja. Quea huesha nee poquiquehuani jayojja poanaje. <sup>22</sup> Jesosa dejja jayojja yamijji nequinaje. Jamajjeya Jesosa Quito esejaya mimishi cuanajo mano'yonajejo, Eyacuiñajjiya eseya ojaya epeeji cuana po mee ca'yonaje. Jamajjeya Jesosa Quitohua eseya Eyacuiñajji yasijje poqui mee caje'yo

mimishi'ama, quea boejea epo'yo pea'ai. Jamajjeya Eyacuiñajji ese nijje quea bei poaje eyajo, ca ojaya esohui jama ba'e tiitiinajejo, Jesosa Quitoja esohuijo jjashahuaba tiitiinquinajejo pea'ai. <sup>23</sup> Jiquio esohui shajja'ajja majje ja'a pajea'yoyji pea'ai! Quea huiso dejjaa quea huiso meshijo ba'eya jiquio esohui shajja'ajja cani eseyaya jayojjaya.

*Jesosa Quitohua ca oe Pabo huoojea canaje esohui huohuiya*

Jesosa Quitoja esohui ojjaña dejjaa shajja'ajja canaje ojjaña meshijo. Eya ca ca iña e'e jojo nei Eyacuiñajji esohui huohuiji; Jesosa Quitoja esohui huohuiaña. <sup>24</sup> Jesosa Quitoja esohui eya huohuiyajo, pea cuaa eya jeyo majje jeanobiajea canaje quea huiso cahuijo; quea nee. Jamatii eya quea bihui nee poani. Yahuajo Jesosa Quito quea nee nee poa. Jjeya eya quea nee pishana poani miquiana Jesusaja esohui jayojja ba'e meesahua-  
jji. E'e pojja'a quijje Jesosa jayojja eya quea nee nee poaje. Dejja cuaa eya napa cajje eya quea ca'a poajo, Jesusaja epeeji cuana quea ca'a poaje pea'ai. <sup>25</sup> E'e jojo nei Eyacuiñajjiya eya huoojea ca'yonaje ojaya esohui huohuiya ojaya epeeji cuana huasijje. Jamaya miquianaya jjapeequi meesahuaña Jesosa Quito nijje. Ojjaña Jesusaja esohui huohuiaña pea'ai. Jiquio esohui eseya Eyacuiñajjiya ba meesahua cani. <sup>26</sup> Jiquio esohui de-  
jja cuanaja quea quehua yahuajo nei poa. Ba mee jjima poa. Jjeya ca ca Eyacuiñajjiya ojaya epeeji nei cuana Jesosa Quitoja esohui ba meesahua cani quea ja'a nee. <sup>27</sup> Jamajjeya jjeya Eyacuiñajjiya

ojsaña ojaya epeejji cuana, Jodio pojjeama cuana pea'ai ba mee sa acani ojaya esohui Jesosa Quitojo. Ma esohui quea pame nee nee jama ba'a: Jesosa Quito esejaya eyami dojjojo nequi tiitiiyani. Jamajjeya eseya jjashahuabaquiani onijje eyajo enequi tiitii'yojji. <sup>28</sup> Ojsaña Jesosa Quitoja esohui ecuaaya huohuiaña quea ja'a nee ojsaña huasijje. Ojsaña nei nei jjabahuejjaqui meeaña ojsaña Jesosa Quitoja epeejji quea ca'a nee epojji. E'e, jamaya poaje Jesosa Quito poe o'oyajo. <sup>29</sup> Miquianaya Quitoja epeejji quea ca'a nee epojji eyaya janobajjima nei esohui huohuiaña Jesosa Quitoja. Jesosa Quito ecuea eyami dojjojo quea ca'a nee nequi. Ohuaya eya esohui ba neinei meesahua cani miquiana huasijje ehuohuijji.

## 2

<sup>1</sup> ¡Bacue jiquio! Eya janobajjima nei jjashahuabaqui majje Eyacuiñajji nijje mimi neineiiani miquianajo Conosajo ba'e yasijje. Mimi neineiiani Jesosa Quitoja epeejji cuana Naonisea cuiñajjijo ba'e yasijje pea'ai, Jesosa Quitoja epeejji cuana ecuea ba jjima cuana huasijje pea'ai. Jamatii eya jjashahuabaquiani onajo pea'ai. <sup>2</sup> Jamajjeya eyaya ojsaña miquianaya Jesosa Quitoja epeejji cuana quea ca'a nee po meesahuaje'yo. Miquianaya pea cuana nijje jjapeequi meesahuaje'yo e'e jojo nei pea'ai, esohui quea pame nee Jesosa Quitojo jjabahuejjaqui meesahuaje. Quea bei nee jjashajja'ajjaquije. E'e, jjeya ojsaña cuana esohui Jesosa Quitoja Eyacuiñajjiya ba meesahua caje'yo quea ja'a nee. Yahujajo

ca maya ba mee jjima poa. <sup>3</sup> Jesosa Quitoja eba ojaye nei Eyacuiñajjija ejjashahuabaquijji, ojjaña tii. Onijje jjapeequianijo, Eyacuiñajjija ejjashahuabaqui'yojji quea ja'a nee ba meesahua cani Jesosa Quitohua. <sup>4</sup> ¡Ecuea esohui etehue'yo ba neineicue miquiaaya! Pea dejja cuana siajje poani Eyacuiñajjijo ¡a'a shajja'ajjajji! Dasia ca chana' mi. <sup>5</sup> E'e, eya ejeanobia ani. Jamajjeya miquiana nijje eya enequijji pojjeama. Jamatii eya jjashahuaba tiitiquiani miquianajo, miquiana nijje nequi jayojjaya. Ecuea eba miquianaya Jesosa Quito nijje jjapee neinei-quiani quea pame nee, ojaya esohui jayojja jama poani pea'ai. Jamajjeya eya quea bihui nee nee poani miquianajo.

*Jesosaa eseya o jayojja ba'e meesahua caje'yo*

<sup>6</sup> Jamajjeya miquianaya Jesosa Quito nijje ebionei jjapeequi'yonajejo oya miquea Emeshi Mese nei quea pame nee poanaje. Jamajjeya ¡ba'ecue ojaya epeejji nei! <sup>7</sup> Jamajjeya ¡Jesosa Quitoja epeejji quea ca'a nee oe pocue! ¡Ojaya esohui ba tiitiicue! ¡Ojaya esohui e'e jojo neiyo jjashahuaba tiitiquicue pea'ai! E'e, jamaya pea dejjaa miquianaya huohui canaje. Eyacuiñajji nijje jamaya mimi tiitiicue: —E'e Eyacuiñajji, jamaya miquea esohui quea pame nee nee.

<sup>8</sup> Dejja cuaa esohui e'e nei pojjeama huohui cani miquianaya. Quea quehua nee, etiiquiana cuanaja esohui. Jesosa Quitoja esohui jayojja jama pojjeama, quea ja'a nee pojjeama. ¡A'a shajja'ajjajji! Dasia caje'yo cuaa mi.

<sup>9</sup> Jamajjeya ¡bacue jiquio! Oya Jesosa Quito eseya jayojja yamijji poa. Jamatii oya Eyacuiñajji

nei poa. <sup>10</sup> Jesosa Quito nijje jjapeequianijo, Eyacuiñajjiya eseya ba'e tiitii mee caje'yo Jesosa Quito jayojja epo'yojji. E'e, Jesosa Quito Emeshi Mese nei oe nei quea ca'a nee nee. Ojjaña eshahua cuanaja mese, Eyacuiñajjiya esohuidojojji cuanaja mese pea'ai quea ca'a pishana, de.

<sup>11</sup> Ojaya etiiquianaja esohui jama Jodio dejja cuaa cuiishasha jehuissejjajea cani. Jamaya huohui jjima acani Jesosa Quitohua. Onijje jjapeequianijo, ohuaya miquianajaya mimishi pajea mee ca'yani, miquianajaya ejjashahuabaqui'yojji quea mimishi chama'yo po mee ca'yani. <sup>12</sup> Jesosa Quito mano'yajo dejja cuaa ohuajea ca poa. Eyacuiñajjiya oya shequi mee ca o'oyanaje. Jesosa Quito ohuajea ca poa jayojja jamaya peaa miquianaya enajo besa mee canaje Eyacuiñajjiyo. Jamajjeya Eyacuiñajjiya Jesosa Quito shequi mee ca o'oyanaje jayojja jamaya ohuaya miquianaya ba'e meesahua caje'yo Jesosa Quito jama epo'yojji, ojaya esohuijo jjashajja'ajjaquianijo. <sup>13</sup> Yahuajo Jodio pojjeamaja Eyacuiñajjiya esohui miquianajaya ba jjima. Quea mimishi nee nee poanijo miquea edojjoshahua cuaqui yasijje dobiqui'yo quiaye poanaje. Jjeya ca ca Eyacuiñajjiya miquianaya ba'e tiitii mee caje'yo Jesosa Quito nijje mimishi cuana ojjaña tii cuijea ca'yonajejo. <sup>14</sup> Esey aje oe Moisesija esohui etehuejo jjashajja'ajjaqui ajjajo, Eyacuiñajjiya tehue mee canaje jama ba'a: “Ojjaña quea mimishi nee nee” poanaje. Jamatii jojaya Jesosa Quito esejaya mimishijo mano'yonaje acui ecueata'apeejo. Jamajjeya Eyacuiñajjiya e'e jojo nei esejaya mimishi cuana cuijea neinei



ca'yonaje. <sup>15</sup> E'e, Jesosa Quito acui ecueata'apeejo mano'yonaje. Jamajjeya eshahua cuana ca'a'ama po mee ca'ya poa, Eyacuiñajjiya. Jamaya ojjaña eshahua mese cuana jeabichajea ca'ya poa. Eyacuiñajjiya ojjaña ba mee canaje eyajo anica.

*¡A'a esohui e'e nei pojjeama shajja'ajjajji!*

<sup>16</sup> Jamajjeya ¡bacue oe! Pea cuaa miquianaya tecuea cani ojjaña bobi miquiaa ijiañajo, pea e'ishijji ishiañajo pea'ai. ¡A'a oya cuana shajja'ajjajji! Jodio cuanaja esohui jama ba'a: Ojee e'ijjajji pojajjo, epojja chacocho mee ajja pea'aijo huohui cani; ¡a'a oya cuana shajja'ajjajji! <sup>17</sup> Yahuajo ma esohui cuanajo dejja cuana jjashahuaba meequi ca'yonaje ma Jesosa Quitohua quijje poe majje acañaje. ¡Jjeya nei Jesosa Quitojo jjashahuabaquicue! Oya ca ca oe nei quea pame nee. <sup>18</sup> Pea dejja cuaa jjacahuibaqui majje miquianaya Eyacuiñajjija esohuidojojji bihuia mee sa acani bobima' ani tii. Ma dejja cuana ojaya ejjashahuabaquijji quea taijo mimi huicha'a huicha'ani. Jama siajje pome poani ba'a: —Ecuea ejjashahuabaquijji quea ja'a nee; onajaya quea ja'a pojjeama —poani.

Tecuea canijo ca oe ¡a'a jjashajja'ajjaquijji! Eyacuiñajji nijje mi poqui pajea mee ca chana'. <sup>19</sup> Ma dejja cuana aje oe Jesosa Quito nijje, esejaya Emeshi Mese nei nijje jjapeequi pajea'yonaje. Eseyaya Emeshi Mese neiya Jesosa Quitohua ojjaña ojaya epeeji cuana jjabahuejjaqui mee cani ojee. Jama ba'a: Jesosa Quito ojjaña ojaya epeeji cuana nijje ese ejja jayojja poani. Ojjaña ojaya epeeji cuana Jesosa Quitoja eyami jayojja poani.

Esapa jayojja esejaya Emeshi Mese nei Jesosa Quito poani. Jiquio ecua esapaa eyami poqui mee cani jayojja jama Jesosa Quitohua ojjaña ojaya epeeji cuana huoojea cani, jjabahuejja meequi cani ojee ejjapeequijji. Jamaya Eyacuiñajjija quea boti nee. Jamaya Eyacuiñajjiya ojjaña ojaya epeeji quea ca'a nee po mee sa acani. Eseyaya Emeshi Mese neiya Jesosa Quitohua ojjaña ojaya epeeji cuana ojee onijje jjabahuejja meequi cani; jamaya Eyacuiñajjiya ojjaña ojaya epeeji cuana quea ca'a nee po mee cani. Jamajjeya ojjaña ojee jjapeequi mee cani Jesosa nijje.

<sup>20</sup> Miqúanaya Jesosa Quito jayojja jama poanijo Jesosa Quitoja epeeji pojjeama cuanaja esohui quea quehua ¡a'a shajja'ajjaji! ¿Apiojji acuae jjeya maya esohui quea quehua shajja'ajja sa poani? Jesosa Quito nijje jjapeequianijo eshahuaja epeeji pojjeama poani. <sup>21</sup> Esohui quea quehua jiquio jama ba'a: —Jiquio aquiána ¡a'a napajji! ¡A'a pea bobi cuana ijjiájji! ¡Pea e'ishijji a'a ishijji! — jamaya dejja cuaa huohui nisho cani.

<sup>22</sup> Jama pojjeama ca ca Eyacuiñajjija esohui. Bobi cuana ijjiájeyo majje chama'yo tii poani. Joya miqúiaa napaña aquiána chama'yo tii poaje pea'ai. <sup>23</sup> E'e, jiquio dejja cuaa pea cuana dasia cani; ojaya esohui quea quehua quea ja'a poso acani cuaa. Jamajjeya pea cuana jjashahuaba quehuaqui majje oe pojji bobi ijjiá jjima acani. Pea'ai Jesúsaja esohui jama ba'e sa po'yo ajja. Cho, quea ja'a pojjeama ba'yani. Jamaya poanijo dejja cuana quea mimishi jjashahuabaqui pajea ajja.

### 3

#### *Yahuajo quea tai ba'ya poa eba'ejji Jesosa Quito nijje quea pame*

<sup>1</sup> Eyacuiñajjiya Jesosa Quito ba'e mee ca o'oyanaje. Jamajjeya ohuaya miquianaya ba'e mee caje'yo Jesosa Quito jayojja. Jamajjeya ijshahuaba tiitiqicue Jesosa Quitojo eyajo eba'ejji! Jama ba'a: Eyacuiñajjiya Jesosa Quito ojjaña huoojea'yojji quea ca'a nee nee po mee ca'yonaje. Oya Eyacuiñajjiya ebianeijji anijji. <sup>2</sup> E'e, ijshahuaba tiitiqicue oe Jesosa Quitojo! ¡Aquiana taijo oe a'a ijshahuabaquijji! <sup>3</sup> Jama ba'a: Dejja emano'yojaa mimishi po'yo ajja. Jamaya miquianaya jjea emano'yo jayojjaya mimishi po sa po'yo ajja. Jesosa Quito Eyacuiñajji nijje nequi tiitiiani. Ohuaya miquianaya jaahuana cani quea pame nee. <sup>4</sup> Jesosa Quito poe o'oyajo, eseya onijje nequi tiitiije'yo quea ja'a nee nee; o jayojjaya poaje'yo onijje jjapee tiitiqianijji. Jamajjeya oe ijshahuaba tiitiqicue Jesosa Quitojo!

<sup>5</sup> E'e, Jesosa Quito nijje jjapeequi majje jamaya ebioneijji acue ba'a: ¡Ojjaña mimishi cuana oe pa-jea neinei'yocue! ¡A'a pea cojjojji pojji! ¡A'a jama ijshahuabaquimeya pojji! ¡A'a quea tai ijshahuabaquijji! ¡A'a quea mimishi ba'e sa pojji! Onajaya aquiana ¡a'a quea jea bajji pea'ai! Quea dejja tai poanijji aje oe miquianaya eyacuiñajji nisho bihuijji jayojja poani, de. <sup>6</sup> Jiquio mimishi cuana jama atiitijji canijji, Eyacuiñajjiya shajjama' cuana quea nee nee po mee caje'yo. <sup>7</sup> Jamaya aje oe miqiaaya yahuajo mimishi ahuicha'a huicha'a'yonaje pea'ai onaaya acani jayojjaya.

<sup>8</sup> ¡Jjeya ca ca pajea neinei'yocue ojjaña mimishi cuana! Jamajjeya ¡a'a quea tecue nee nee pojji! ¡A'a quea quene nee nee pojji! ¡A'a quea mase nee nee pojji! ¡A'a pea nijje mimijajiji! ¡A'a quea tai mimijji! <sup>9</sup> E'e, miqúanajaya eba'ejji quea mimishi yahuajo jama apajea'yonajejo ¡a'a siajje pojji! <sup>10</sup> Jjeya miqúanajaya eba'ejji quea pame nee po'yonaje. Eyacuiñajjiya miqúanaya ba'e meesahua cani quea boejea, o jayojja epojji, o ba neineiiji epojji. Jamajjeya ¡a'a quea mimishi po'yojji!

<sup>11</sup> Jamajjeya Jesosa Quito nijje jjapeequianijo ojjaña ojaya epeeji cuana cajjapeequiahua pea nijje; pea jayojja oe capoahua. Jodio cuana ca ca Jodio pojjeama jayojjaya ca'a'ama; deja ecui-ishasha jehuisseja'yo ca ca cuiishasha jehuisseja jjima jayojja pea'ai, Jieno deja pojjeama cuana, Sitinia deja cuana pea'ai; echacoji sosema' ca ca deja echacomeejjima' jayojja, ca'a'ama ojjaña. Jesosa Quito ca ca oe nei quea ca'a nee nee nequi tii tii. <sup>12</sup> E'e, Eyacuiñajjiya miqúanaya babaca ca'ya poa ma ojaya epeejjime epojji. Ohuaya miqúanaya quea jea nee nee acanaje pea'ai, Eyacuiñajjiya. Jamajjeya quea pame ba'ecue jiquio jama ba'a: ¡Aema' cuana ba'e meesahuacue! ¡Pea cuana nijje jjapeequicue! ¡Mase'ama oe pocue! ¡Quea bei oe pocue! ¡Tecue'ama pea'ai oe pocue! <sup>13</sup> ¡Ona nijje tecue'ama pocue! E'e pojja'a pea cuaa miqúanaya quea mimishi acaje. ¡Jamatii ojaya mimishi pajea'yocue; ohuaya miquea mimishi capajea ca'yahua pea'ai! E'e, Jesosa Quitohua miqúanajaya mimishi cuana cuijea ca'yonaje; jamajjeya ¡miqúanaya oe pea cuanaja mimishi pa-

jea'yocue! <sup>14</sup> E'e jojo nei ¡pea cuana quea jea nee acue! Jamaya poanijo miquianaya ojee quea ja'a nee nee ba'eje. <sup>15</sup> ¡Miquianaya oe quea bei nee nee ba'ecue Jesosa Quitohua miquianaya quea bei nee ba'e meesahua canijo! Miquianaya ca ca oe Jesosa Quitoja epeeji poani. Jamajoya eseya ¡japeequi mee caje'yo quea cojja bei epojji. Majoya miquianaya iyaa ca'yonaje Eyacuiñajjiya. ¡Eyacuiñajji bihuiacue pea'ai!

<sup>16</sup> ¡Ojjaña Jesosa Quitoja esohui cuana shajja'ajja tiitiicue! ¡Quea ja'a nee esohui esejaya epeeji cuana huasijje huohuicue; shajja'ajjacue pea'ai! ¡Ojee ¡jabahuejjaqui meecue quea ja'a nee pea'ai! Eyacuiñajji bihuiañajo jama pocue ba'a: ¡Sohuicuayacue quea bihui nee Jesosa Quitojo! ¡Miquianaaya Eyacuiñajji bihuiacue sohuicuayaniya pea'ai! ¡Quea quijijji bei nee pea'ai pocue Eyacuiñajji! E'e, ¡o jayojjaya jama ba'ecue! <sup>17</sup> Eseyaya Emeshi Mese nei Jesosa. Ojaya epeeji poanijo ¡ojjaña miquea esohui ojaya yajji acue! ¡Ojjaña miquea echaco ojaya epojji chacocue pea'ai! Jesosa Quitohua miquianaya jamaya amesahua canijo, ¡Eyacuiñajji, esejaya Chii ai oe bihuiacue!

*Eyacuiñajji esejaya eyamijo quea pame nequi*

<sup>18</sup> Jamajjeya ehuanase cuaaya, Jesusaja epeejiya, ¡yahue shajja'ajjacue! Jamaya miquianaya quea pame nee poaje. <sup>19</sup> Yahueya, ¡miquea ehuanase quea jea nee acue! ¡A'a oe onijje quea tecue nee poji!

<sup>20</sup> Esho'i cuaa, Jesusaja epeeji poaniya, ¡shajja'ajja tiitiicue mique chii, miquea enaese pea'ai!

Jamaya miquianaya poanijo, Jesosa Quito quea bihui nee poaje. <sup>21</sup> Echii cuaa, enaeseya pea'ai, ja'a jamatii tecuea huicha'ajji mique bacua cuana! Oya cuana quea yeno nee poaje miquiaa tecuea tiitii'yajje.

*¡Echacojji cuana, echacomeejji cuana pea'ai quea pame oe pocue!*

<sup>22</sup> Miquianaaya echacomeejjijo chacochoani ojaya yajjijo imiquianaja echacomeejjija esohui jama chacomeya oe acue, ojjaña tii! ¡O ba majje a'a chaco nishojji! Cho. ¡E'e jojo nei quea bihui nee oe chacocue ojaya! ¡Jamaya oe acue miquianaaya! ¡Jesosa Quito oe quea jea nee ejja'aqui! <sup>23</sup> Miquianaaya echacomeejjijo chacoñaajo Eyacuiñajjijo chacoña pea'ai. Jamajjeya ¡chaco neineicue Eyacuiñajjijo quea bihui nee epojji! <sup>24</sup> E'e, miquianajaya eba jama ba'a: Quijje eyajo esejaya Emeshi Mese neiya miquea echaco quea pame nee cuana sosequia caje'yo, ma ecua ohuaya huohui ca poa jayojjaya acaje'yo. E'e, miquianaya chacochoani Jesosa Quitojo, esejaya Emeshi Mese neijo. <sup>25</sup> ¡Bacue oe! Eyacuiñajjiya ojjaña shajjama' cuana napa caje'yo quea mimishi poani sosejje. Ohuaya ojjañaja mimishi ba cani. Jamajjeya joya quea mimishi nee nee poani janobajjima nei napa caje'yo; joya quea mimishi pishana poani oe pojji napa caje'yo.

## 4

<sup>1</sup> Ojjaña echacomeejji cuaa, ¡shajja'ajjacue mo oe! Miquea echacojji cuana miquea yajjijo chacochoani ¡sosequiacue oya huiso tii! ¡Oya cuana

oe jaahuanacue quea pame nee epojji! ¡A'a pa-  
jea'yojji miquea Emeshi Mese neiya eyajo aniya  
miya ba tiitii cani!

*Pea cuana Pabohua niñeshe'a cani*

<sup>2</sup> Epeeji cuana, ¡mimi majamajacue Eyacuiñajji  
nijje ojjaña pojjajo! ¡Huea'ama mimicue! ¡Oya  
oe bihuiacue onijje mimianijo! <sup>3</sup> ¡Eyacuiñajji nijje  
oe ojee mimicue ecuanajoya pea'ai! Jamajjeya  
ohuaya ecuana huohui meesahua tiitii caje'yo  
esohui pame nee Jesosa Quitoja, ma onajaya  
yahuajo ba jjima. Ma esohui eya huohuiajoya,  
dejja mimishi cuaa eya iña majje jeanobiajea  
ca'yonaje. <sup>4</sup> Jamatii miquianaya ejo Eyacuiñajji  
nijje mimianijo, ohuaya eya Jesosa Quitoja esohui  
huohui meesahua caje'yo quea ja'a nee.

<sup>5</sup> Jesosa Quitoja epeeji pojjeama cuana nijje  
mimianijo ¡jjashahuaba neineiquicue quea ja'a nee!  
¡Quea pame nee oe ona nijje po tiitiicue pea'ai!  
<sup>6</sup> ¡Quea bei, quea ja'a nee pea'ai mimicue Jesosa  
Quitoja epeeji pojjeama cuana nijje! ¡jjashahuaba  
neineiquicue onijje mimi jjimahuajo! Jamajjeya  
onaya Jesosa Quito ba meesahuaje'yo.

*Pabohua quea bihui nee esohui tehue canaje pea  
cuana huasijje*

<sup>7</sup> Dejja Tiquico bajjani Jesusaja epeeji, e jay-  
ojjaya Jesusajo chacochoani, ecuanajaya quea  
jea nee nee. Ohuaya eya chacosahua ca'yonaje  
Jesosa Quitojo quea pame nee pea'ai. Ohuaya  
miquianaya huohui cañaquije jiquiojo e ba'yanijo.  
<sup>8</sup> Eyaya oya huoojeaje miquiana huasijje e hu-  
huiya. Ojaya esohui ecuanajo shajja'ajja majje  
¡quea bihui nee pocue! <sup>9</sup> Tiquico nijje Onesimo

poquije. Oya ecuana jayojjaya Jesusaja epeeji quea pame nee pea'ai. Yahuaajo oya miquiiana-jaya cuiñajjijo ba'ya poa. Ojjaña jiquiojo onaa acani huohui caje miquiiana huasijje, Onesimohua. <sup>10</sup> Anitaco enijje ejeyo'yo nequi ejjajeanobi-aquijji equijo. Ohuaya miqianaya huohui'ajja cani jama ba'a: —¿Achajja acuae quiiana so'o? —ojaya ebajji.

Macosohua pea'ai huohui'ajja cani: —¿Achajja acuae quiiana so'o, de, ecuanajaya ebajji?

Oya Macoso Benabeja jjo'yaseja bacua ejja. Miquiana que poquiyajo, ¡oya jaahuanacue quea pame nee! Jamaya eyaya miqianaya huohuinaje yahuaajo. <sup>11</sup> Jesosa Josoto yani pea'ai. Ohuaya huohui'ajja cani pea'aiya: —¿Achajja acuae nequiiana so'o, ecuanajaya ebajji?

Jiquiojo pea beca peejjima Jodio cuana Jesusaja epeeji yani. Ohuaya eya chaco meesahua cani quea pame nee Eyacuiñajjija yajjijo, esejaya Emeshi Mese neija yajjijo. Pea Jodio cuanaja enijje chaco jjima, de. <sup>12</sup> Epapasi cuanaya yani enijje. Ohuaya pea'ai esohui quea bihui nee huohui cani miquiiana que. Yahuaajo oya miquiiana nijje ba'ya poa pea'ai. Jesosa Quitoja yajjijo chaco cani ohuaya. Janobajjima nei mimi tiitiani Eyacuiñajji nijje miqianajo jama ba'a: —Eyacuiñajji, ¡miyaya ojjaña Conosajo ba'e cuana Jesosa Quito nijje jjapeequi meesahuacue quea ja'a nee! ¡Miquea esohuijo e'e jojo nei oya cuana jjabahuejjaqui meesahuacue! ¡Miquea esohui jama ba'e tiitii meesahuacue, Eyacuiñajji! —jamaya Epapasi mimiani Eyacuiñajji nijje miqianajo.



<sup>13</sup> E'e, Epapasi mimi tiitiiani Eyacuiñajji nijje miquiana jaahuanajji. Quea huesha cuiñajji yasi-  
jje Jesusaja epeeji cuana Naonisea cuiñajjijo ba'e  
yasijje, Jienaponi cuiñajjijo ba'e pea'ai yasijje Ey-  
acuiñajji nijje mimi tiitiiani, Epapasi. Jamaya  
eyaya oya baña. <sup>14</sup> Ecuanaajaya epeeji quea pame  
nee Noca bajjani yani jiquiojo. Oya eshicuijji quia-  
jji, de. Dejja Demasi bajjani yani pea'ai. Ohuaya  
esohui quea bihui nee huoojea cani miquiana  
huasijje.

<sup>15</sup> ¡Ecuanaajaya esohui quea bihui nee  
huohuicue Jesusaja epeeji nei cuana huasijje  
Naoniseajo ba'e yasijje! ¡Epona Nema bajjani  
oe huohuicue! ¡Ojaya epeeji cuanaya pea'ai  
huohuicue, joya oja equi yasijje jjachachaquiani  
Eyacuiñajjija esohui baa! <sup>16</sup> E'e, jiquio ecuea  
esohui etehue'yo ba neinei majje ¡huohuicue  
Jesusaja epeeji cuana huasijje Naoniseajo ba'e  
yasijje! Majoya ohuaya miquianaya quia caje  
o'oya pea esohui etehue'yo, ma eyaya ebionei  
tehuenaje o que. ¡Ma esohui shajja'ajjacue, ojjaña  
miquiaaya! <sup>17</sup> Pea dejja Aquipo bajjani huohuicue  
ecuea esohui jama ba'a: —Eyacuiñajjiya miya  
huoojea ca'yonaje ojo chacohua. Jamajjeya  
¡chacocue quea pame nee ojo! ¡Ojjaña joya ecua  
ohuaya huohui cani jamaya oe acue!

<sup>18</sup> Eyaya ca eya jiquio esohui quea bihui nee  
tehue'yonaje. Dejja cuanaja eya pichojea'yo jjima;  
eya ejeyo'yo tii nequi. ¡A'a eya pajea'yojji! ¡Ey-  
acuiñajjiya miquianaya cajaahuana tiitii cahua  
quea pame nee!

Mahuiso. Eya Pabo bajjani esohui tehuejji.  
Apoa.

**Eyacuiñajjija Esohui**  
**New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

---

PDF generated using Haiola and XeLaTeX on 11 Nov 2022 from source files  
dated 29 Jan 2022

88838088-e20d-51ca-8c91-69194f5ae678